

編號 2 號

【長尾鵲¹】胡明華原作

有一日，佢當當在屋下拚書桌個時節，阿姊玄風用 LINE 傳訊息分佢講：「佢分人攻擊咧！」麼个？阿姊分人攻擊？有傷著抑係仰般無？佢心肝肚七上八落，緊張到會死。

阿姊平常時溫柔又有禮貌，識撈佢共下過個人逐儕都安腦，想愛接近佢都來毋掣咧，佢可能有人會想去傷害佢？敢係堵著壞人？佢越想越掛吊。

正恁樣想啊忒，阿姊又 LINE 來：「這就係兇手！」還合等一張相片。佢看真兜，相片肚係一頭樹仔，樹樑企等一隻尾長長個鳥仔，原來係一隻長尾鵲。毋係堵著壞人，佢個心肝正較定貼下來。

原來，阿姊行過樹林，突然間感覺腦屎背分麼个東西撞著，小可暈暈。該載天時旨暗，阿姊有看著係一隻鳥仔，就遽遽用手機撈鳥仔个樣仔翕下來。毋過該隻鳥仔像還旨過願樣，又連連續續對背後衝過來觜幾下到佢個頭那。阿姊無哪園，歸路用衫筒等頭那，盡命牯走，心臟乜嘖嘖滾跳無停。過後，阿姊斯開始毋敢

行落樹林肚，驚又會有麼个東西來傷著自家。

佢戴在一隻大社區裡肚，自然環境當好，樹仔又密又多，大家盡好出來散步運動，成下還看得著長尾鵲。阿姊這下盡量毋出門散步咧，成時隔壁鄰舍堵著佢，還會問起阿姊係毋係搬走咧？

阿姊緊想恁樣下去毋係辦法，喊佢去尋資料看。專家講，長尾鵲會觜人，其實撈阿啾箭會觜人个原因差毋多。逐年三、四月到七、八月，係長尾鵲孵子个時期，佢兜為了保護鳥子，正會出現攻擊个行為，這種情況下把會有一、兩禮拜恁久。所以，在孵子期間愛注意，毋好行忒兼，莫挑挑去撩佢兜。假使會驚乜做得擎遮仔、戴帽仔，就較安全。

阿姊聽佢个勸話，知事情个頭尾就無恁驚咧。朝晨，阿姊撈佢去行社區肚較少人行个細路。路兩片个樹仔生到高天天，人講識有長尾鵲在這作竇，所以阿姊細心細意，先做好準備。

幾隻長尾鵲在樹頂飛來飛去，長槓槓个尾，紅啾啾个觜撈幼細細个腳爪，一身青青，看起來實在還靚。最重要个係，這擺無「兇手」咧，阿姊講佢這下認真看長尾鵲，正知佢會恁靚。

¹ 長尾鵲：音 chong mui` siag；臺灣藍鵲。

編號 3 號

【幸福个味緒】李淑娟原作

幸福係麼个味緒？有人會講，係放學時節轉到屋下，對灶下傳來个焮豬腳香味；也有人會講，係阿爸下班過後膻身个臭汗酸味；也有人講，係暗晡頭屋背該頭桂花樹淡淡个花香。味緒，看毋著、聽毋著乜摸毋著，當奇妙个係，佢總係做得摻佢兜个回憶園共下，食著、鼻著共樣味緒个時節，回憶乜會跣等像戲齣樣又再過放送出來。

佢爸在佢讀國中三年生个時節過身咧，因為發現肝癌个時節忒慢，已經第三期。佢辭忒頭路拖等著病个身體做年零个治療，扞下佢姆摻佢兜兩兄弟就轉長山賣鴨卵咧！阿爸分佢印象最深个毋係長壽菸个味緒，毋係醫院肚吊大笏射¹个藥味，嘎係佢个手路菜「番茄炒雞卵」个好味緒。

阿爸个「番茄炒雞卵」一定愛特別用臨暗頭市場賣伸个、有靠傷个、嫋嫋个番茄，因為該下頭家愛收攤咧，會半賣半相送。佢當沙鼻講：「雖然這毋係星級个材料，毋過有阿爸五星級个好手藝啊！」斷真哦！這項菜上桌个時節，紅啾油光油光个番茄，

合等該綿綿嫩嫩又黃淦淦个雞卵，還旨落嘴就先吞口水咧。該香香又酸酸甜甜个味緒，單淨攪味就做得划忒兩碗白飯，這幸福个味緒一直園在佢个記憶裡肚毋會散忒。

阿爸做化療該段時間，阿姆天旨光愛先去送牛乳，正趕去工地做小工，無時間煮飯。佢摻老弟輒常食白飯傍醬菜、豆腐乳、魚罐頭，係無就泡麵加一隻雞卵。阿爸愁慮佢兜營養毋罇，刻耐仔忍等身體个毋鬆爽煮菜分佢兜食。逐擺酸酸甜甜个味緒食落肚，佢个心乜跣等酸酸甜甜，甜个係阿爸惜子个心意，酸个係，毋知還做得過食加幾多擺這幸福个味緒？

對佢來講，幸福就係「番茄炒雞卵」該酸酸甜甜个味緒，佢總會帶出佢最深、最甜个回憶，分佢看著阿爸黃蠟个面容頂高掛等滿足个笑容。這下佢又乜最驚食著這樣菜，因為佢驚食忒多別家个「番茄炒雞卵」，會害佢毋記得記憶當中阿爸留分佢个味緒，該阿爸惜子个味緒，佢摻阿爸共下个幸福味緒。

¹ 吊大笏射：音 diauˋ tai+ gong sha+；吊點滴。